

JABATAN PERKHIDMATAN VETERINAR MALAYSIA

LAPORAN LIPUTAN MEDIA

ISNIN, 12 APRIL 2021

1	Komplot 19 kartel daging
2	Pakatan jahat terbongkar
3	Kaut RM52 juta setahun

DISEDIAKAN OLEH:

**SEKSYEN KOMUNIKASI KORPORAT
JABATAN PERKHIDMATAN VETERINAR MALAYSIA**

Polis bongkar kegiatan
tukar daging haram jadi halal

KOMPLOT 19 KARTEL DAGING

- Pakatan jahat 19 syarikat yang berkomplot mengimport daging sejuk beku dari Brazil dan mengedarkannya di pasaran tempatan menggunakan logo halal palsu terbongkar selepas 36 individu ditahan dalam Op Kartel Daging, Jumaat lalu.
- Syarikat terbabit dikesan telah mengedarkan lebih 1,000 tan daging berbanding 108 tan yang dibenarkan dalam permit import, selain mengaut keuntungan sehingga RM52 juta setahun.
- Menurut Pengarah Jabatan Siasatan Jenayah Bukit Aman, Datuk Huzir Mohamed, polis masih mengesan dua lagi suspek yang masih bebas iaitu Tan Siew Huak dari Ulu Tiram, Johor dan Wong Ah Kheong dari Kuantan, Pahang.

2



Pakatan jahat terbongkar

Pengimport daging sejuk beku dari Brazil bersekongkol dengan pengedar kaut untung sehingga RM52 juta

Oleh FARAH SHAZWANI

JOHOR BAHRU

Pakatan jahat melibatkan 19 syarikat pengedar daging dengan pengimport daging sejuk beku dari Brazil terbongkar apabila seramai 36 orang suspek ditahan dalam Op Kartel Daging yang dilancarkan pihak polis di seluruh negara.


Pengarah Jabatan Siasatan Jenayah Bukit Aman, Datuk Huzir Mohamed berkata, dalam operasi khas bermula 9 April lalu, polis berjaya menahan semua suspek berusia dari 28 hingga 67 tahun, melibatkan 26 lelaki dan 10 perempuan.

Menurutnya, tangkapan itu melibatkan 15 suspek di Johor, tujuh di Pulau Pinang, Kuala Lumpur (tujuh), Selangor (lima), Perak (seorang) dan Kedah (seorang).

"Hasil siasatan setakat ini mendapati syarikat utama yang terlibat merupakan pengimport daging sejuk beku yang sah dari Brazil.

"Mengikut permit pengimport, syarikat itu hanya layak mengimport sebanyak 27 tan daging bagi satu permit dikeluarkan."

Muka depan *Sinar*
Harian 2 Disember
2020.



Huzir (kanan) bersama Ketua Polis Johor, Datuk Ayob Khan Mydin Pitchay (tengah) menunjukkan carta aliran pembekalan daging serta tangkapan kartel pada sidang media di IPK Johor pada Ahad.

katanya dalam sidang akhbar khas di Ibu Pejabat Polis Kontinjen (IPK) Johor di sini pada Ahad.

Tambah beliau, hasil siasatan mendapati syarikat tersebut hanya menggunakan empat daripada lima permit pengimport dikeluarkan bagi tahun 2020 atau melibatkan 108 tan daging sahaja.

"Bagaimanapun, syarikat itu didapati mengedarkan lebih daripada 1,000 tan kepada 202 pelanggan yang dibuktikan melalui invoice yang dirampas," ujarnya.

Menurut Huzir, sebanyak 19 syarikat pengedar yang bekerjasama dengan pengimport utama itu berjaya dikesan dan tangkapan melibatkan tujuh syarikat di Johor, empat syarikat di Kuala Lumpur, Selangor (empat), Perak (satu), Pulau Pinang (dua) dan Kedah (satu).

Katanya lagi, 19 syarikat tersebut yang merupakan pengedar daging meraih keuntungan



Syarikat terbabit didapati menempah kotak berlogo halal secara tidak sah. (Gambar hiasan)

tahunan antara RM1 juta dan RM52 juta.

"Syarikat pengimport daging itu mendapat bekalan dari Brazil dan turut menerima bekalan daripada syarikat tempatan.

"Bekalan yang diterima akan dibungkus semula sebelum diedarkan kepada pelanggan.

"Syarikat ini juga didapati telah menempah kotak berlogo halal untuk membungkus semula daging yang diimport dari Brazil dan yang diterima daripada syarikat tempatan bagi memenuhi permintaan pelanggan," terang beliau.

Jelas Huzir, siasatan polis mendapati, kegiatan itu menyebabkan timbulnya isu keraguan status halal terhadap bekalan daging yang ada di pasaran negara.

Katanya, ia bukan sahaja memberi kesan kepada umat Islam, tetapi kepada seluruh rakyat Malaysia memandangkan daging yang dibungkus semula juga tidak dapat disahkan tahap kebersihannya dan tidak diperakui oleh pihak veterinar.

"Polis akan meneruskan siasatan berkaitan isu kartel daging ini dan usaha mengesan dua lagi suspek yang masih bebas iaitu Tan Siew Huak dari Ulu Tiram, Johor dan Wong Ah Kheong dari Kuantan, Pahang giat dijalankan," tegasnya.

Jalan mudah halalkan daging import

SINAR Harian pada 23 November lalu mula mendedahkan mengenai syarikat ejen fret yang menguruskan proses import daging sejuk beku mengambil jalan mudah mengimport daging sejuk beku dari negara yang tidak menerima kelulusan sah Jabatan Kemajuan Islam Malaysia (Jakim).

Kegiatan yang berlaku sejak beberapa tahun lalu itu didakwa dibantu 'orang dalam' di pintu masuk negara apabila kebanyakan daging sejuk beku import itu dibawa masuk menggunakan dokumen palsu.

Pada 1 Disember 2020, satu serbuan dilakukan Jabatan Perkhidmatan Kuarantin dan Pemeriksaan Malaysia (Maqis), Kementerian Perdagangan Dalam Negeri dan Hal Ehwal Pengguna (KPDNHEP), Kastam Diraja Malaysia, Jakim dan Jabatan Agama Islam Johor di sebuah gedung sejuk beku di Senai, Johor.

Lapan kertas siasatan dibuka dengan lapan oleh SPRM, manakala KPDNHEP dan kastam masing-masing satu.

Sebanyak tujuh pertuduhan dibuat terhadap tiga individu termasuk seorang yang masih bebas di bawah Seksyen 5(1)(a), Seksyen 5(1)(c) Akta Perihal Dagangan 2011, Perenggan 4(1) Perintah Perihal Dagangan (Perakuan dan Penandaan Halal) 2011.

Susulan daripada serbuan itu, pihak polis menjalankan siasatan lanjut dengan membuka dua kertas siasatan di bawah Seksyen 505(b) Kanun Keseksaan di peringkat Bukit Aman dan Seksyen 120B Kanun Keseksaan di Kontinjen Johor.

Siasatan Seksyen 505(b) Kanun Keseksaan telah tiada tindakan lanjut (NFA) kerana tiada keterangan untuk menuduh mana-mana individu manakala siasatan di Kontinjen Johor mendapati wujudnya elemen yang menjurus kepada kesalahan pakatan jahat jenayah.

Lanjutan itu, pada 9 April 2021, Op Kartel Daging dilancarkan oleh Jabatan Siasatan Jenayah di seluruh negara.

Operasi tersebut mengambil masa lama untuk dilancarkan kerana menunggu hasil siasatan dari agensi lain selesai.

Oleh Nurul Amanina
Suhaini
am@hmetro.com.my

Johor Bahru

Polis menahan seramai 36 individu menerusi Op Kartel Daging yang dilancarkan pada 9 April lalu di enam negeri kerana disyaki terbabit dengan sindiket kartel daging sejuk beku import.

Pengarah Jabatan Siasatan Jenayah Bukit Aman Datuk Huzir Mohamed berkata, 34 daripada yang ditahan itu ialah pengarah syarikat manakala dua lagi pengurus berusia antara 28 hingga 67 tahun.

Beliau berkata, sebanyak 19 syarikat pengedar disyaki berkomplot dengan sebuah syarikat yang mempunyai permit sah mengimport daging dari Brazil itu.

"Mengikut syarat permit, syarikat ini hanya layak mengimport 27 tan daging bagi satu permit yang dikeluarkan namun mengedarkan lebih 1,000 tan dengan keuntungan tahunan sehingga RM52 juta.

"Mereka menggunakan empat daripada lima permit pengimport yang dikeluarkan bagi tahun lalu selain didapati mengedarkan kepada 202 pelanggan.

"Perkara ini dikesan menerusi invoice yang dirampas polis," katanya pada sidang media di Ibu Pejabat Polis Kontinjen (IPK) Johor, semalam.

Turut hadir, Ketua Polis Johor, Datuk Ayob Khan Mydin Pitchay.

Huzir berkata, syarikat itu turut didapati menempah kotak berlogo halal untuk membungkus semula daging import dari Brazil.

"Siasatan mendapati syarikat ini banyak menerima tempahan kerana menawarkan harga lebih murah selain

KAUT RM52 JUTA SETAHUN

*Polis tahan 36 individu
disyaki terbabit sindiket kartel
daging sejuk beku import*

memberi kemudahan pembayaran mudah iaitu kredit selama tiga bulan berbanding syarikat lain yang menerima pembayaran tunai semasa serahan (COD).

"Syarikat ini juga mampu memenuhi permintaan pelanggan kerana sentiasa mempunyai stok mencukupi sedangkan siasatan mendapati syarikat itu hanya menggunakan empat permit bersamaan 108 tan daging.

"Kegiatan ini menyebabkan timbulnya isu keraguan status halal terhadap bekalan daging yang ada di pasaran, bukan saja memberi kesan kepada masyarakat, malah daging yang dibungkus semula

tidak dapat disahkan tahap kebersihannya dan tidak diperakui veterinar," katanya.

Sehubungan itu, beliau berkata, polis sedang mengesan dua dalang utama berusia 42 dan 44 tahun untuk membantu siasatan.

"Dua kertas siasatan dibuka mengikut Seksyen 505(b) Kanun Keseksaan peringkat Bukit Aman dan Seksyen 120B Kanun Keseksaan di Kontinjen Johor.

"Siasatan bagi Seksyen 505(b) Kanun Keseksaan menunjukkan tiada keterangan untuk menuduh mana-mana individu, namun siasatan di Kontinjen Johor mendapati wujud elemen yang menjurus kepada kesalahan pakatan jahat jenayah," katanya.

